

豫

章

焚

書

第七冊

石初周先生文集序

文章之在古今猶天地之元氣未嘗一息間也論者謂文章繫乎世運盛則盛衰則衰是未足爲知斯文者世運盛文章固與之俱盛及其衰也文章不與之俱衰何也盛而非文之用不能以致治衰而非斯文之未喪何以扶當時之衰以啓後來之盛乎蓋盛而衰衰而復盛者世運之常文章與天地並不隨世運也是以文章顯而世運爲之盛文章藏而世運爲之衰顯顯於天下藏藏於人心藏其本也故凡文章之顯於天下者皆藏於人心者爲之此乃人得之於天

所以合元氣以御世運者世運豈得而盛衰之哉然
顯者天下共知而尊之藏非知道之君子不易與語
此也嗚呼廬陵文章者向矣近遭世亂儒道幾墜今
英材輩出各以其所能詩若文自高而不知有應俗
之慙其將何以拯之乎同郡周石初先生續其世學
而介然自守其爲文爲詩有古意有奇氣能使人讀
之興起而隱居深藏不妄交不求名故雖老成而人
鮮識之者余以爲當此之時得如先生者數輩以激
昂後學使有所法庶幾鄉國有天下士以鳴

聖朝啓運之隆而古文復倡於茲豈不足爲廬陵光

而未見有志之同者豈天無意於顯者而猶有待邪
然則先生之文與詩何可使晦而弗彰乎至是先生
之門人晏彥文編錄爲集且道先生之命欲余爲之
序余昔雖嘗學於鄉先生之名能文辭者而未能今
又窮處而耄及何能與於此而先生獨不鄙夷之意
者天將復顯斯文歟先生其知我矣於是述愚所見
附于集之末以俟夫能古文而顯者以質其然否焉
洪武癸丑孟夏初吉老友劉玉汝成之書

石初周先生文集序

石初周先生負奇氣抱硯學卒困蹟不偶其窮益堅而文益壯吾雖未識然得其製作一二於他許相識已多乃今其門人晏彥文編集其亂離諸作彙成巨帙以借余讀之乃曰石初知先生幸爲我敘之嗚呼廬陵之文自歐公倡之乃天下之文也名家繼作迄宋終元皆歐門股肱心膂之臣而或者妄肆胸臆點染雖黃其間君子所不較也近年得歐集殘而精彩溢出者莫如虞先生自餘亦安得瞠若乎廬陵哉先生之文成之劉公序之至矣復奚容贅雖然石初有

三幸焉當有元盛時獨不利場屋一也至正之季所
在化豺狼雖間道暫時而康莊不失今歸然獨存二
也江南野史誰復健筆而集中隱約散見皆可爲國
史補三也使先生幸乃濶一第不幸逢時不祥必將
矯矯令節必不渙泓似倪爲名教羞然位與勢之相
侔志與才之相協有不可必者固不如昭文之不鼓
也白髮殘年坐籌海屋殆有陰相之福詩不云乎不
愁遺一老宰物者其愁遺之矣先生之詩必將有傳
於後昔賢稱杜詩似史記豈不以天寶以來間事不
得少陵載而傳之安能如是此史傳所不及也吾於

石初之詩亦云洪武六年臘月陳謨心吾敘

石初周先生文集序

粵若稽古太上有立德其次有立功其次有立言聲
之精者爲詩詩之精者爲雅爲頌古今詩人之窮無
如子美精於詩者亦無如子美顛倒短褐到處悲辛
信窮矣致君堯舜自比稷契詩能窮之乎周公思兼
三王制作雅頌詩之精者也吉甫作頌穆如清風亦
詩之精者也詩不能窮人也謂子美以詩而致窮且
不可謂古聖人而窮於詩可乎同郡周石初先生當
不諱之朝必以窮經爲事必以舉進士爲業然天不
能使人材必出於科第亦不能使人材必盡出於科

第惟材力時命適相值者邇無往不逢耳用是坐廢而先生之門受業滋多先生之文日益富矣余觀唐宋諸大家工於詩者每不足於爲文文不兼詩詩不兼文而先生獨能兼之也迄二十年兵革之禍旣裂冠毀冕斷腸招些未之前聞余所親記石壕新安彭衙之類在治忽者往往有足徵焉而先生一飯不忘君之意惓惓忠愛溢於言外此先生之文之必傳於永久無疑也嗟夫士窮則脩於家不窮必功覆斯民然後出孔明所師者龐士元司馬德操所友者崔州平徐元直石廣元孟公威假令南陽秉耒不釋則索

然俱爲陳迹矣世豈知有伊呂之事哉然則先生之
不遇其志亦可悲矣先生命其孫安卿從余正範之
學且換此藁來就余評余故舉魯人之論古之死而
不朽者以獻焉

洪武七年甲寅中秋日葛化誠夫書

石初周先生文集序

石初周先生余四十年前友也長余十歲始定交於桂隱劉先生之門時方銳意場屋累試有司不偶乃歛其英華發爲詩文雄偉俊邁自成一家有金玉之音無脂韋之態深爲諸老所器重旣而世變紛紜東西奔竄比年復客城西年踰八十老氣崢嶸顧當時輩行准余一人存更倡迭和議論縱橫累日不厭教授子弟必道彝倫之言平生詩文千百篇厄於灰燼此編特兵後感時觸事之作不輕以示人間出與余評余竊觀其學問文思度越輩流且賦性剛介擇交

寡言晚生後進多不知其所爲亦不屑與之語侵尋
暮景厯艱涉危猶傲睨一時決不肯阿順苟容其胸
中所養如此故發爲詞華如風雷振蕩長江大河令
人悚敬而不可涯涘不必循規蹈矩而藹然溫和不
必扼腕張拳而凜然激烈沈著痛快慷慨抑揚由其
平日淹貫諸大家積之旣深發於毫端皆渾然天成
類非勉強步驟所能及嗚呼近時詩文一變蹈襲梁
隋以夸淫靡麗爲工纖弱妍媚爲巧放肆驕佚傲然
自謂古之人厚誣當時以誑惑聾瞽是皆先生之罪
人也先生之學切於爲己先生之心樂於及人其素

所樹立如余者豈足爲輕重哉特有感於風化之移
易鄉之隱君子相謂曰石初氏端莊不矜語必已出
生平孤介自信深堅非其人竟席不發一談若可與
言則盡情傾吐然傾吐時甚少故流輩多不合晚遭
世變足未嘗入城關一步名不挂投贈卷中惟教授
諸生夜分忘倦蓋其天性然也閱視悲歌慷慨由少
陵忠愛根之詩道陵夷首倡正論古風不泯伊誰之
力哉斯言也得其彷彿故述之庶足以質余之非誇
云

石初集目錄

卷一

五言古詩二十四首

卷二

七言古詩二十首

卷三

七言古詩二十二首

卷四

五言律詩十九首

七言律詩四十七首

卷五

五言絕句十二首

七言絕句一百零五首

卷六

序十首

卷七

記六首

卷八

志二首

銘四首

卷九

傳一首

說二首

書後六首

卷十

題跋三首

贊七首

祭文一首

石初集卷一

元 安福周霆震撰

五言古詩

美人昔燕趙

美人昔燕趙歲久江漢間
軒窗粲明霞被服羅綺紈
頰怒恒自持含意詎敢攀
一朝強暴陵相從卽懽顏
傾身作歌舞豫恐恩意闕
新聲與嬌態取媚巧百端
主家隔風塵庭宇深且完
豈無昔共處永夜青燈寒
魂夢各所依寧復相往還
沉沉九秋霜履屢思蒹葭
娟娟中天月照影留空山
盛時槩無虞末路良獨難